

松陽縣志卷之十二

雜事志

祥異
仙釋

靈異

休徵咎徵理應天人致災致祥捷於影響凡有關茲
一邑者曷可忽諸若夫神感靈應理介渺茫釋跡仙
踪事多幽幻律以夫子神怪不語之義固可畧而不
書然舊冊所存何堪遽逸間登一二以為該洽之資
聊備見聞之助云爾志雜事

祥異

宋

嘉熙四年旱

松陽縣志

卷之十二 雜事

寶佑五年旱

咸淳十年旱

宣和十年潦

元

延祐元年田禾漂

泰定二年水旱

至正十年旱

十六年螟

明

洪武九年旱

十七年水壞民居

正統三年旱

十年大熟

十三年二十都橫山居民屋中出血里許厚一尺雞犬不食

成化九年旱

十五年火水壞田地

正德十年旱

十一年地震雪積丈餘

十三年旱

十六年冬地震如雷

嘉靖四年大水

五年大旱

六年麥大稔

八年屢出居民患之

十四年正月朔大雪五日十五年十二月大雷電

十六年二十都十八都山裂二十餘里

二十九年旱

三十年潦

松陽縣志

卷之十二 雜事

二

三十一年四月一雷擊死五牛背有字莫辨次年是月日又如之

四十四年冬雷震大雨雪又下黃土

萬歷二十五年池塘水漲蕩漾有聲

二十六年四月水漲獨山渡溺死五十三人

二十九年三月夜大風雨羅木崗文昌閣仆

三十一年六月大風松樹墩石亭仆壓死四人

三十二年十一月地震 三十三年旱

三十四年旱

三十五年旱

三十六年旱

三十七年旱

康熙五年旱

九年旱

十一年十二月大雪積五尺餘

二十年旱

二十五年閏四月大雨四晝夜赤塔埠房屋漂沒南門內水滿七尺舟行城市傍河廬舍俱漂淹斃人口壞四鄉田地三十餘頃石堰橋梁俱壞

二十八年旱

三十六年旱

四十一年旱

五十四年大旱蠲賑

六十一年大旱賑濟

松陽縣志

卷之十一

雜事

三

雍正元年大旱賑濟

二年九月南門善官舖火北至上太平舖東至橫街塔頭舖大街兩傍店屋俱燬

十年蟻蝨食禾

乾隆十二年大旱賑濟

十六年大旱賑濟

二十六年五月大雨十三都高亭出蛟壞民居田地

乾隆六十年

嘉慶五年城中大水舟可入城漂沒廬舍廟宇無數申報有案

嘉慶廿五年東北鄉出蛟水入城東冲壞民舍

道光元年大旱餓殍甚衆

道光十四年大旱穀價甚昂

道光十五年大旱賑濟

道光二十四年連旬大雨水溢城鄉十五六都冲壞田
地民居無數

道光二十五年旱

道光二十六年城南善觀舖火上至桶蓋亭西至官塘
口及市塢頭亭下兩旁店屋俱燬

咸豐四年大水

咸豐五年地震

松陽縣志

卷之十二

雜事

四

咸豐六年九月大雷雨三都楊家堂沒竹等庄各山崩
裂數十餘丈

咸豐八年三月二十三日變賊竄陷死者甚衆

咸豐十一年五月十一日寇復至城又陷

同治四年正月大雪積三尺餘

同治十二年麥大稔

靈異

松陽卯山乃葉法善修真之地有怪石奇峰形如喬松
有枝葉

堰蛇蕭梁時詹南二司馬築堰於松陽溪上引流溉田

功久不就遇一老人曰過溪見異物卽其地也如其言見一白蛇橫亘中流於是循其波痕以築乃就空中言狀元沈晦爲處州守無子因家於松陽過石牛渡忽聞空中言曰狀元沈晦與爾一子後果得子亦至顯官

夢王珪潘景珪松陽人生時其祖宗回方隱几而寐夢一偉丈夫紫綬金章拜於前問曰汝何人也答曰唐王珪聞公積善願爲公後乃以屬其子覺而得孫因命曰珪

處州刺史邕以詞翰名世法善求邕與其祖有道先生國重作碑邕從之文成請并書弗許一夕夢法善請曰向辱雄文光賁泉壤敢再求書邕喜而爲書未竟鐘鳴夢覺至丁字下數點而止法善刻畢持墨本往謝邕驚曰始以爲夢乃真耶世稱此碑爲追魂碑舊以爲靈異歐陽文忠公云有道先生葉公碑李邕撰并書余集古所錄李邕書頗多最後得此碑於蔡君謨爲余言邕之所書此爲最佳也其碑文云昔者誕發老君道純天地生德夫子身負日月且時宰不宗主人勿用矧乎埋照浚谷潛盤窮山幽姿蛻於塵

容素若允於仙類豈辟命行矣爵服繫之而已哉公諱國重字雅鎮南陽葉縣人也自少典錫美高辛箕緒陶唐重熙后稷邁種文王之允乃食於沈尹成之子載封於葉受氏享國大哉邈乎逮乎祖乾曷克壯其猷永孚于德堊戶習隱塞兌億坤碩膚長才通理博藝雖安車累至而堅卧固辭故慶祚克開眉壽維永矣厥考道興性守官庭道敷邦國居鬼從地率神從天受籙以怛之飛符以北之扼魍魎之邪劉臺台之祟有足奇也至於揮扎落紙引弓貫草特起五部廣推大餘侯誰嗣哉先生靈承道宗異聞訓誨弱後

文貌勿尙純篤仙骨有象童心不萌專精五龍遍遊羣岳聽以知遠明以察微達生死之苦體物氣之變嘗以靜貞動耗息影歸止雲卧北壑林巢仙居人絕不鄰道阻且右獨徃幽勝永歌隱淪放閑保和習虛致靜摺五石之髓擷三芝之英時或不留歲聿其逝緇鬢純漆韶顏渥丹事適元同神與道媾惟寂惟冥不飯不食數十載於茲乃升聞帝庭駿發皇眷簡才受命降尊加禮將之以文馬速之以暢轂先生盱眙長揖握手高謝曰自昔帝舜登庸德輝允鑠光武繼統吏道孔嘉且薛方逢萌備外臣之禮虞仲夷逸終

處士之業豈垢俗疵物偏貢介性將探道慕類坐致
奇齡使者蓄而然之疑申遂行之旨乃周覽廬室躬
省倉廩考疇人之疆畝訊家僮之作業皆儉以遵約
安能惟始味不甘口色無養日信以爲著誠去僞敢
守難奪順風可卽強起曷至焉遂虛覲復命慙歎同
列朝廷企其高渴其道聆嘉聲而屬想者豈勝言哉
有司以天元書闕星度官弛亡五德之運謬四時之
分荆鬼越祥不知所况子亥母癸烏識其源皆乘遠
遠尋請益傳受可謂繩誠列而曲直徵衡誠懸而輕
重立粵惟博物君子豈伊小說鯁生嗚呼天不持久
人將復歸頽年迫於期頤遠志屈于摧落小兆幽石
託墳清林逸人不追國士靡憲泉石沮色鄉縣失聲
豈無他人惟子之故允子慧明贈銀青光祿大夫歛
州刺史公罔替厥猷代增其業啟秘籙之高妙揚元
津之洪波道微若聲心麼若氣吹律暖谷運歷知天
屢下辟書終不應命孫子景龍觀道士鴻臚卿越國
公幼得父書早傳成法夤念有訓邁迹自身讀天下
之書備方外之術火滌滌祀劍誅羣妖恩開五君名
動四國其入也排金鎖謁紫庭爲帝傲吏其出也法
玉京坐元寺作人宗師故能大匠道門冢卿朝右禮

食軒座寓直禁廬矣嘗以理氣自強登老益壯雖暮
景急節而純孝孔哀是獻封章願拜墳墓有軫帝念
載形王言神扎以飛傳瑞乃發羣公帳餞列藩郊迎
朝章有輝鄉人皆慶枉以末技揚于孝心惟先志以
追遠立豐碑以紀德夫何間然詞曰宗門素履家代
隱仙道一相孕薪火交傳黃公術在赤水珠聯道開
幽鍵性與直筌一門累祖四世百年抗迹巖谷消聲
天地卓爾遐舉藹然高致麝以臭焚珠以明墜人則
有心徵亦不至保身匪媮全樸爲利孝孫增業明辟
順風志嘗無忝事或不同徵賢朝滿舉逸山空曷繇

高枕克謝代工測微達變盡規納忠皇眷雖渥孝思
亦深章服燦燦博駟駿駿載遠廷闕是展墳林紀石
追遠昭銘率心孝忠事立榮歿寵今遐超古始承憲
江南開元五年歲在丁巳三月七日侍者清溪觀主
詹元一丁

石碁子葉法善與道侶奕於遂昌之牛頭山局終擲棋
子於地化爲石後人於其地得石每一卷石中有小
石碁子圓滑紺白初出土尙溫軟就劈取可足一局
又時有石螺石蟹但不能常得之

趙賣雷者元時人稱初陽真人爲宋宗室母孕時有神

人言曰是兒有異於常事聞於外元人捕之得真人
方八歲流落入三茅山茅君教以度世術至十三歸
懸牌於衣帶上書蓄賣風雷人異之初茅君之別也
謂真人乏食許其賣雷自度每令小兒伸手書一雷
字於掌擦之熱捻之開卽虩然震天兼辟邪由是人
爭買之松旱縣請禱真人應聘至壇請官民迎雨時
天日炎赫衆以爲難真人以墨汁咒符火之黑雲蔽
天大雨如澍真人年將踰百忽至白龍山頂祭太乙
夜半飛昇而去

潘自然明初人爲逍遙觀道士善符咒燒煉之術能號

召風雷居雲巖山中每夜有神燈張掛於門出而無
踪歲旱求自然禱然請衆各備雨具行衆晒之至期
果大雨又云三日登壇三日雨一聲號令一聲雷

祈雨異石萬歷間松陽旱極城中迎卯山葉真人溪南
迎六都鄭仙姑各趨導禮拜遇於五星廟之前仙姑
從左而去真人從右而來雨不甚濡惟大發風雷是
夜仙姑殿後壁左邊忽擲一石其狀圓其大兩合抱
破壁而入止於中堂仙像不毀遠近人趨觀其異及
覓石之發跡處遍山無土痕或以爲自遠飛來者此
更異也土人徙石于階下完其廟壁人皆曰此越國

公怒也然真人與仙姑同邑同著仙籍甯有此意乎
但自此而後迎仙姑者必趨徑避真人

仙釋

葉法善字道元祖儉避地于松陽卯西山間母劉氏夢
流星入口吞之而娠及產神光滿室異香彩雲繚繞
於庭七歲涉江三年不返還問其故則曰二青童引
我飲雲漿故留連焉長而修煉神丹元通廣大飛騰
幻化無所不至元宗聞之召入便殿不以臣禮待之
詔入後宮觀燈法善曰西涼府今夕之燈尤盛帝曰
欲往觀得乎法善曰此易耳請帝瞑目騰祛而上卽

至以所隨如意貫酒復請瞑目已還殿中遣使於涼
州取如意以驗之八月望夜與帝遊月宮因聆天樂
問其名曰紫雲帝更之曰霓裳羽衣自月還過潞州
俯視城郭峭然月色如晝請帝以玉笛奏曲遂投錢
於城中旬日潞州奏八月之望有天樂臨城兼獲金
錢以進帝累與近臣試其道術皆非妄幻若夫凌雲
化鶴追岳神致風雲靈驗之事不可殫述後法善與
其祖求墓志於郡守李邕但許其文不許其書竟追
其魂書而刻之續以聞邕邕曰初以爲夢今果然矣
至今莫不異之開元八年庚申法善年已一百七歲

忽見天樂彩雲上覆法善化劍而去

戴火僊秦漢以前入留名山修煉道成陽精畢露於頂故以戴火名在山隱見不時每晚或懸於山鄉人皆知其爲戴火僊日則見人而不見火夜則見火而不見人至唐時邑人毛雲龍者好修嘗創祠候戴火僊於留名山三年無所遇忽一日見二人奕於石雲龍在傍觀奕局未終覺苔侵於石上奕者曰子可以歸矣雲龍頓首而還祠人曰子何之今三年矣及再至其所不可得雲龍修煉于留名山其火如舊風月夜則仙樂發於山中若八音具奏徹曉乃已或異香過鼻則火懸衆莫知其故

白龍瑞見夫人姓周氏未笄時至江邊汲水得一物如日香美感觸掬而食之蓋龍精也有孕父母惡之夫人誓於天日奔走巖穴以自絕於人世既而生一兒夜則求乳日則去夫人曰兒其妖也兒曰予白龍也帝遣之托生於人兒變化異於他龍日司巖洞夜斂形來夫人以爲誑願示之形蜿蜒倏霍風電震赫夫人驚死晉時松旱縣令陳時禱雨於百仞山忽見白龍見於山上大雨如注令上其事更名爲白龍山縣亦因之立廟祀夫人爲龍母廟又名太婆廟蓋因鄉

人稱之早仍禱焉

葉藏質法善裔孫也唐懿宗時人累召不起終得其祖之術解化而去

豐去奢元人也居卯山修煉山之東有巨石忽神人語曰此下有劍丹乃昔人所藏者子盍取之去奢謝曰賦性荒謬豈敢妄求後三年忽風雨石起劍丹出焉時麗水人葉造擁衆自立爲牧索去奢劍丹更囚之密室數月不與飲食及開室如故異之送回一夜風雨劍丹復歸石下去奢仍居山十年忽辭謝鄉人跨白鶴而去

鄭仙姑者鄭氏姊妹同心學道每謂塵世景光修短靡常乃取南岳魏夫人傳讀之曰夫人有夫已落第三乘矣求謝自然而師之二人每於靜夜焚香求度忽一女奴持呂洞賓詞歌曰坎離坤兌分子午須認取自家宗祖地雷震動山頭雨要洗濯黃芽出土捉得金精勞閉固煉甲庚要生龍虎他年問汝甚人傳但說道先生姓呂鄭氏習之蓋呂公昔度張珍奴之作也又得葉法善八使雲屨之法白日可以騰空初習時姊去妹守爐烟妹去姊守爐烟及其陰盡陽純則變化無方矣其後宗人爲之立祠於靈鷲山下謂之

僊姑廟

劉應真字從道少有逸氣長禮吳若容爲師壯受籙於龍虎山張虛白傳法於汪惟德元祐間召至京師主上清儲祥宮賜紫衣號靈寶虛應師有道德經解意行世

徐泰定字虛寂紫虛觀道士宋尙書梁汝嘉墓在松陽萬山間有觀行庵開禧初泰定居之一日有吹雙笛道人至庵與泰定語相合授以丹訣仍贈筆一枝令作水墨山水泰定謝不能道士曰但隨意爲之遂畫如素習後十年道人欲挾之遠遊泰定辭乃留詩別

去鐵笛雙吹破曉烟相逢又是十年前曾將物外無窮意總付毫端不盡傳白髮數莖君老矣青雲一朵我飄然世間究竟只如此何似同歸洞府天泰定年八十餘常童顏端坐而逝吹笛道人自稱李同名疑呂洞賓

祖謙禪師居邑之西屏山嘗遊京師與學士蘓東坡友善東坡遺之詩曰道人曉出西屏山來施點茶三昧手忽驚午盞兔毫班打作春甕鶯兒酒天台乳花世不見玉川風液今何有東坡有意續茶經要使祖謙名不朽

雪堂和尚葉姓曾叅指源佛眼二師乃大悟遂遍歷名山士大夫多禮待之

道行姓葉氏衢州守仲謙之子弱冠侍父宰盱眙因禮普照王塔遂剃髮受具父母不能奪其志游方叅指源潤佛眼二禪師乃大悟徑山大慧禪師寄偈褒之紹興二十一年示疾歸寂初師之學于佛眼也習禪癡坐至於塵宛顏面蝨汙衣領皆不之顧佛眼一日饌賓令師通殷勤移時不至使人往趨之見師于空室面壁屹立不動其爲學勤苦如此宣和間父守衢州師徃省至州不去包錫直入郡治閤人拒之師遺

以金乃得入至重門又拒之復遺以金及堂見母母持之而泣二閤始叩首請罪還所遺師曰他人物非我有也其待人以恕如此師晚年居善因寺將終老焉州太守屈主治平寺師勉強而出踰年遷主法海寺適僨卒猖獗人皆奔竄師巖然不動舒徐自若其善於處變又如此師之平生行業卓卓可觀名不虛得信哉

守常自號翠峯少祝髮於里之覺宗寺於書不甚通解同衣晒之守常以爲耻遂發憤遊方與衆誓曰學不得道不復還鄉於是遍走名山叅訪禪宗得悟作偈

頌深造理窟一日端坐而化

松陽縣志

卷之十二

雜事

十五